

Federalno ministarstvo okoliša i turizma
Marka Marulića 2
Sarajevo

Predmet: Komentar na Vaš dopis broj: 05-23-1615/13 od 14.08.2014. godine, dostavlja se

Poštovani,

Primili smo Vaš dopis od 14.08.2014.godine uz koji nam dostavljate podatke o emisijama i izvještaj radne grupe Ministarstva o realizaciji pojedinih projekata iz plana aktivnosti po okolinskim dozvolama Arcelor Mittal-a Zenica. Zahvaljujemo se na dostavljenim podacima i informaciji i imamo odgovarajuće zamjerke i upite:

1. Znamo da niko ne provjerava podatke koji se dobijaju od strane Arcelor Mittal-a. Do kada će se raditi na ovakav način, a da Vam ništa ne smeta i da Vas ništa ne tangira.

Na primjer, kako se došlo do podataka o emisijama benzola? Od kada su emisije benzola na aglomeraciji a u drugim pogonima ih nema ako se zna da se koksnii plin koristi kao gorivo skoro u svim pogonima Mittal-a, a posebno emisije benzola mogle bi biti izraženije oko razvodne mreže koksnog plina?

Podaci o emisijama koje Vi nama dostavljate, a koje Vi dobijate od Mittala samo Vama koriste. U više navrata smo tražili podatke o izmjenjenim emisijama i drugim podacima na dimnjacima kako onih pogona gdje su ugrađeni uređaji za kontinuirano mjerenje zagađujućih parametara, tako i na dimnjacima gdje nisu ugrađeni uređaji za kontinuirano mjerenje. Ti podaci koje tražimo su jedino uporedivi sa Pravilnicima o dozvoljenim graničnim vrijednostima emisija u zrak iz proizvodnih pogona i jedino mjerodavni za sankcionisanje Zagađivača zbog nepoštovanja zakonskih propisa.

Površnost informacija je očigledna sa čime se ni Vi ni mi ne bi smjeli pomiriti, jer nas loše stanje okoliša u Zenici sa ovakvim radom vodi u nedogled. Zanemarivanje naših upozorenja za netransparentno prikazivanje stvarnog ekološkog stanja je ravno obmani koju javnost kontinuirano trpi.

Nadalje, šta je sa emisijama organskih polutanata (VOC) na dimnjaku Koksare kao i u okolini kosne baterije i međupogonskog razvoda koksnog plina? Tražili smo pismeno od inspekcije da se da nalog Mittal-u da izvrši dodatna mjerenja emisija organskih (VOC) polutanata. Niko ne reaguje na ovu vrstu kancerogenih zagađenja. Tražimo da se redovno i javno objavljuju rezultati svih mjerenja emisija zagađujućih elemenata iz ove fabrike, jer svi podaci moraju biti javno dostupni (član 13. Zakona o zaštiti zraka, i član 10. Zakona o zaštiti okoliša u FBiH).

2. Što se tiče Izvještaja radne grupe Ministarstva o realizaciji pojedinih projekata iz plana aktivnosti po okolinskim dozvolama Arcelor Mittal-a Zenica može se reći samo to, da isti nije rezultat stručne analize već stav Mittal-a.

Zašto su netransparentna imena radne grupe?


Za ovakvu tvrdnju pokazuju slijedeće činjenice:

- Prvo, za odustajanje ugradnje uređaja za izdvajanje H₂S iz koksnog plina nije tačna konstatacija da provedba ove mjere nije izvodiva iz tehničkog i tehnološkog aspekta.
Vama možda nije poznato da je za realizaciju ove mjere bio urađen Investicioni program 1987. godine, koji je uradila firma "RMK Inženjering" po preporuci Američkih stručnjaka iz Tehničkog projekta za smanjenje zagađenja u Željezari Zenica. U ovom dokumentu su data sva tehnička i tehnološka rješenja u šta se možete sami uvjeriti.
- Drugo, rokovi ostalih mjera na Koksari, Aglomeraciji, Toplani i BOF Čeličani su prolongirani do 2020. godine, a za neke mjere rokovi nisu ni utvrđeni. Takođe, za do sada "navodno" urađene projekte efekti realiziranih mjera su nepoznati.

Javnost Zenice ne prihvata takve analize, ako se ne zna kakvo je stanje bilo prije realizacije određene mjere, a kakvo je poslije realizacije određene mjere.

Poštovani, postavljaju se mnoga pitanja na koja sada nema odgovora. Kome i čemu služe ovakvi izvještaji? Stanovnicima Zenice sigurno nisu od koristi.

S poštovanjem,



Muhamed Islambegović, dipl.ing.

Predsjednik UO Eko forum Zenica

